

AKASHVANI AIZAWL
REGIONAL NEWS UNIT
REGIONAL NEWS BULLETIN
(MIDDAY)

Friday, February 13, 2026

Time - 2:30pm - 2:35pm



WORLD RADIO DAY

Vawiin February ni 13 hi World Radio Day a ni a, Akashvani News Aizawl ngaithlatute chibai kan buk cheu a, Radio hian India mipui za zela 99% lai a thleng phak a ni.



STATE DAY OF PRAYER

State Day of Prayer Committee bultumin kumin hian a tum thumna atan State Day of Prayer hman a ni leh dawn a, thupui atan 'I din thar leh ang u (Nehemia 2:17)' hman a ni ang.

Vawiin chawhma khan State Day of Prayer Committee hruaitute chuan Aizawl Press Club-ah State Day of Prayer kumina hman a nih dan tur an sawifiah. Chairman Rev. Lalramliana Pachuau chuan mi zawng zawng tel turin an sawm atih a sawi a. Party leh sorkar hmalakna ni loin, kohhran hrang hrang intelkhawm hmalakna a nih thu a sawi a, ram tana tawngtai ni in a tum ber chu zoram mipuite a rual a, thinlung pumkhat pu a ram tana tawngtai a thatna leh hlutna hriat tlan a tul tih hriat a tha a ti a ni. Tawngtai ho tura inbuatsaihna atan senso ngaite mi thahnemgaiten an thawh thin thu sawiin, sorkar sum pakhatmah hman a ni lova, kuminah hian cheng nuai 15 ruahman a nih thu a sawi bawk.

Kumin hian State Day of Prayer hi Lammualah ni 5 chhung (February 16-20) hman a ni dawn a. Kumin 2026 hi Mizorama harhna a thlen kum 120-na a ni a, harhna a lo thlen leh theih nana tawngtai chu he State Day of Prayer in a tum bulpui ber pakhat a ni a, chumi denchhen chuan ni 5 chhung Aizawl Lammualah ram tana chawngei-a tawngtaihona buatsaih a ni dawn a, hemi hunah hian Mizoram District hrang hrang-ah leh ram pawnah pawh mahni remchan dan angin hman a ni dawn bawk a ni.

February ni 16-19 chhung chhun lamah tawngtaihona hman tur a ni a, February ni 18 zan dar 8 atanga a tuk zing dar 6 thleng tawngtai hona neih tur a ni a, Lammualah leh pandal hlan nghal a ni ang. February ni 19 zan dar 8 atanga a tuk zing dar 6 thleng tawngtai ho tur a ni. February ni 20 ah nilengin Mizoram tana tawngtai ho tur a ni a. Hmun li atangin kein leh hmun thum atangin two wheeler-in kawng zawh a dawn a, Lammualah an kalkhawn ang. Lammualah chhun dar 12 ah hun hman a ni dawn.



NATIONAL SEMINAR

Mizoram English Literacy Society buatsaih seminar-ah ram chhung leh pawna college hrang hrang a zirlai 19 ten paper zir ho a ni.

Vawiin hian Pachhunga University College-ah National Seminar 2026 neih a ni a, thupui atan 'Textual Horizons: Exploring emerging literatures and new narrative forms' tih ni-in, he hunah hian Mizoram chhung leh pawna college hrang hrang a zirlai 19 ten paper present a. NEHU Associate Professor Dr Namrata Pathak chuan 'Plant Humanism' tih thupui hmanin thu a swi bawk.

Mizoram English Literary Society hian kumtin seminar hi an buatsaih thin a, zirtirtu leh zirlai tamtak te tan, an research te mi tam zawk hriat tura pho chhuah nan

platform an siam thin a, seminar bakah Journal of MIELS kumtin chhuak an tichhuak bawk thin a ni.

MIELS leh MYC tangkawp chuan nikum khan thalai tam zawkin lehkha chhiar an uar zual zel nan tiin Litfest te an lo buatsaih ho tawh a ni.



OFFICE HOUR

Mizoram sorkar hnuaia hnathawkte Pisa kai hun chu February ni 16, Thawhtanni atangin tih danglam a ni leh tawh dawn a, kumin October ni 2 thleng hman a ni ang.

Mizoram chhung leh hmar chhaka Mizoram House-a thawkte tan Pisa kai hun chu zing dar 9 atanga tlai dar nga a ni tawh ang a. Mizoram House hmun danga mi - New Delhi, Kolkata, Mumbai leh Bengaluru a hnathawkte tan chuan zing dar 9:30 atanga tlai dar 5:30 thleng a ni thung ang.

Kum tinin ni rei zawng a zirin sorkar hian Pisa kai hun hi a ti danglam thin a ni.



ROAD SAFETY MONTH

Vawiin khan Kolasib DC Conference Hall-ah District Safety Commitee buatsaihin 'Road Safety Month' hawn a ni.

Kolasib SP Pu Lalrinpuia Varte chuan, road safety chu mitin ngaih pawimawh tur a ni, a ti a. Road safety chu motor khalhtute chauh ni lovin, ke a kal mipui (pedestrians) te pawhin an ngaih pawimawh a tul thu a sawi. SP chuan tunlaiin thalai leh kawng kal thenkhatin mobile phone khawih paha kawng kan kan ching thin chu thil pawithei leh hlauhawm tak a nih thu sawiin, fimkhur leh zual turin chah a. Road safety in a tum - chetsualna thleng thin tih tlem kawngah sorkar leh mipuite tanrual a, theihtawp kan chhuah tlan a pawimawh a ni, a ti.

SP hian Motor khalhtute pawh fimkhur taka lirthei khalh turin a chah a, chak lutuk (over speeding) a tlan lova, a hun leh hmun a zira speed control thiam a tul thu a sawi bawk. SP chuan, "Traffic rule leh dan te hi min phuarrittu ni lovin, an himna atana duan a ni tih hre turin a chah bawk a ni.

